

Chor Mischedau Grischun Turitg

Concert d'advent en la baselgia dils predicaturs el vitg bass

Igl ei puspei aschi lunsch. Sin mesiamna ils 3 da december envida il „Chor Mischedau Grischun Turitg“ a siu concert d'advent en la baselgia dils predicaturs/Predigerkirche a Turitg. La preparaziun da quel ha giu entschient gest suenter il concert primavaun digl avrel vargau. En la fin d'jamna da cant l'entschatta da november sin „l'insla da musica“, in part dall'insla claustrala da Rheinau, ha dirigent *Remo Weishaupt* luvrau e mulau da miervi vonavon cun las ovras da differents genres.

In ferm sustegn ha il chor survegniu dalla pianista *Daniela David* che ha fatg part dalla fin dall'jamna da cant. Suenter sia scolaziun da scolasta primara ha ella studiau cant e concludiu cun il diplom da concert. Gia bauld eis ella s'interessada per il cant choral (Chorgesang) e perquei absolviu il studi da dirigenta. Sper igl accumpignament dallas canzuns al clavaziun vegn Daniela David ad embellir il concert cun differents arrangements da clavaziun.

Il cumponist roial

Ina buna part dil concert secompona da canzuns digl enconuscent cumponist e dirigent engels, *John Rutter*. El ha studegiu musica al *Clare Collge* a Cambridge ed ei staus dals 1975 entochen 1979 sez leu directur da musica. Cun il chor *Cambridge Singers* ch'el ha fundau 1981 eis el vegius renomaus per sias cumposiziuns e registraziuns sin dc. Rutter vala per in dils pli impurtants e populars cumponists da musica sacrala e corala. Musicalmein san ins allocar el en la moderna tardiva. Ina armonica complexa e ritmica che cumpeglia era elements da jazz ed gronda variaziun da melodias datan alla musica da Rutters ina forza sugestiva. El ei era daventaus enzatgei sco cumponist dalla cuort roiala. Aschia ha el saviu cumponer la musica per il giubileum dad aur dalla Regina Elisabet ed il psalm festiv per las nozzas da prenci William e Catherina Middleton.

Dirigent *Remo Weishaupt* ha ellegiu in triep da quellas canzuns adattadas per il chor e translatau ed adaptau ils texts en romontsch. Las canzuns ein ualti pretensiusas. Schibein ritmus sco harmonias ni disharmonias basegnan in pulit engaschi da tuttas varts entochen ch'ei „sesa“. Mo lu plaian ei adina dapli e francamein van ei lu era a cor al publicum da concert.

Advent e Nadal

Canzuns romontschas cun la tematica dil misteri da Nadal e talas che espriman l'atmsfera dil temps denter advent ed entschatta digl onn niev enraman il program da concert. Denter auter La nona fila, Curò Mani / Jon Guidon; Canzun dil bien pastur, Duri Sialm / Carli Fry; Nadal, Carli Scherrer / Giusep Cathomas; Dorma o Bambign, pop. / arr. G.G.Derungs eav.

El texts dallas canzuns specificamein d'advent entupein nus tut ils simbols tradizionalis en connex cun il schinumnuu misteri da nadal. La steila, il stgir, il freid, la stalla, il pursepen, la mumma che ha parturiu, igl affon sil strom, il cant dils aunghels, ils pasturs, la pasch annunziada per tuts. Simbols per in misteri cun il qual la plipart da nos contemporans han difficultats. Tgi ughegia aunc da mirar si el tschiel dallas steilas e quintar cun pasch per tuts en in mund nua ch'ei ha strusch enzacu dau tonts camps da battaglia sco gest ozildi? E tonaton ein gest quei ils simbols per il castgaun che vul mirar sur sesez e siu pign mund ora. Per anflar direcziun e per s'encorscher tgei che va dretg e seniester. Ils pasturs han capiu la nova, buca ils pussents.

**Il concert ha liug mesjamna, ils 3 da december allas 19.30 en la baselgia dils
predicatur/Predigerkirche, Zähringerplatz, 8001 Turitg. Tram 4 e 15 entochen Rudolf-
Brun-Brücke.**

Ciril Berther